



Adrian

de Adrian

De Adrian hott e paar vunn denne Äschd uffs Feier geleege, wo er am Omend gesammelt unn kläägebroche hatt. Funke sinn e paar Meter in de Himmel gestoobe und dann ääfach so verglieht.

"Jo", hotter mit me diefer Seufzer gedenkt, "des wär ich jetzert aach am Liebschde, son Funke, der wo sich in die Luft schwinge duhd unn dann uffheert zu soi. Unn er hott sich ibberleegd, wie des wohl wär, wanner sich jetzt ganz dicht neber des Feier leege kennt und oischloofe unn wanner fesched schloofe deet, dann kämen die Flamme unn er kännt grad wie son Funke vergliehe.

Ganz ruhich hotter uffem Bode gehockt, de Adrian, unn hott die Knie fesched an die Brusched gezooge unn sich noch soim Wohnwaage geseht unn noch all denne Geräusche, wo die Zirkustiere machen unn die Nas hätt so gern denne Geruch vunn Elefantemischd unn vunn Schminke unn vunn Gemiesesupp geroche.

Es war am Moint gewese, alser ääfach fort gerennt iss, weil sich kääner defier interessiert hott, waser sich ibberleegd hatt fer soi neies Programm.

"Kumm Adrian." hott de Direktor gemäänt unn gelacht, "fer die Leit unn die Kinner zm Lache zu bringe in de Pause, zwische de große Nummern, dodefier hott doi Programm immer gelangt. Fang mer bloß kää neie Ferz ahn. Uff doi alde Daache werd aus dir kää große Mime mehr. Was issen ibberhaupt los mit dir? Johrelang warsched de Pauseclown unn ich war zufriede mit dir unn die Leit hänn immer schää gelachd ibber doi Posse."

Wie en Schlag uff de Backe war des fer denne Adrian. Er iss uff de Holztreppe vor soim Wohnwaage gesesse unn die Träne wollten ääfach net laafe. Oft warn se in de letschede Johre gelaafe.

Noch de letschede Vorstellung, wanner allääns in soim Wage gehockt hott unn sich geseht noch me Mensch, noch me warme Körper zum Feschedhalte unn zum Deile unn fer enonner do soi. Äämol werklich lache unn nett nur die breit Gosch uffgemolt hadde.

Abber fer die Fraue warer immer nur de Clown Adrian, de bleede Augusched unn Kääni hott hinner dem uffgemolte Depp denne ernschthafte Adrian entdeckt, der wo de Fausched auswendich gewisst hott, unn der gern äämol nur vorm Publikum de Mephisto gespielt hätt.

Unn wieer do uff dere Holztreppe gehockt war, do issem soi ganz Elend hochkumme unn er wollt nur noch fort vum Zirkus. Hott nix mitgenomme unn aach net de Wohnwaage abgesperrt. De ganze Daach isser ääfach de Sunn nochmarschiert, bisser an denne Grillplatz kumme iss, der mitte uff dere Wies war. Drum erumm war de Wald unn de Adrian hott ahngefange Holz zu sammele unn dodebei hotter sich de Bauch mit Himbeere vollgestoppt, weil de Hunger kumme iss unn dodezu hotter des Brotknerzie gekaut, wo eigentlich fer de Jumbo, denne Zirkuselefant gedenkt war.

Wie es Feier runnergebrennt war unn er iss näher an die Glut gerickt, do hott uff de anner Seit Jemand gestanne. So e schääni Fraa hatter noch niemols gesieh, unn sich garnet gefroochd, wo die jetzert herkumme iss. E rotes, langes Kleed hatt se ahn unn die Hoor warn aach rot unn dodeweh hott des blasse Gesicht besonders edel gewirkt.

"Dädsched mer jetzert de Mephisto spiele?" hott se mir ner ganz warme Stimm gesahd und in ihre griene Aache hott sich der Rest vum Feier gespiegelt.

De Adrian hott nochemol Holz uffs Feier geleege unn im Schoi vunn de Flamme hott se ausgesieh, wie so e



Adrian

römisch Gottheit.

Was ist verwünscht und stets willkommen?

Was ist ersehnt und stets verjagt?

Was immerfort in Schutz genommen?

Was hart gescholten und verklagt?

Wen darfst du nicht herbeirufen?

Wen hören jeder gern genannt?

Was naht sich deines Thrones Stufen?

Was hat sich selbst hinweggebannt?

Als er ruhig war, hottse vorm Adrian gestanne. Er hott ihn Kuss unnd ihn reife Körper gespiert
unnd wie die Flamme um die Zwee hochgeschlage sinn, do war de Adrian ääner vunn dene Funke.

Lesen Sie [hier](#) die komplette Diskussion zu diesem Text ([PDF](#)).